

卷之九

重印陝西中部縣志

民國廿四年

邵力子



重印陝西中部縣志序

黃帝爲吾中華民族初祖圓顛方趾之衆襲承餘蔭生息于此土者迄今凡四千六百餘年矣明禋大禮歷代相沿民國二十四年春中樞簡派專使致祭黃帝陵寢張公溥泉邵公元冲鄧公家彥受命西來清明前三日旌旆抵陝維時春雨霑濡田禾暢茂神皋沃壤民祝綏豐四月四日晨聯車北發余率寅僚偕往助祭卽日抵同官阻雨留駐一日六日之夕止宿中部城內明日祀於帝廟棗盛豐潔縣長甕君墨山實主其事典禮莊嚴士民參加者至五千人之多崇德報功蓋空前所未有也傳曰國之大事在祀與戎我黃祖征蚩尤作甲子造律呂製衣裳文德武功炳耀史冊而中部一邑實爲神靈式憑之所邑乘記載信而有徵顧舊志成于有清中葉殘篇僅存流播未廣徵文考獻恍然興懷以時事多艱未遑重事修纂乃助欣諄囑甕

中部縣志

卷首序

君姑就舊稿速爲重印藉舉廢墜越三月刊校旣竣爰爲記祀陵原委如右而一時與祭諸公暨張默君夫人仰瞻陵廟感觸威靈發爲歌詠辭並可觀因並登諸簡端用附祝史正詞之義民國二十四年七月陝西省政府主席紹興邵力子

民國二十四年祭黃陵文

中國國民黨中央執監委員會

維中華民國二十四年四月七日中國國民黨中央執行委員會監察委員會謹推委員張繼邵元冲代表致祭於中華民族始祖

黃帝軒轅氏之靈曰

蓋聞功莫大於撫世建國德莫崇於厚生利民勛莫高於戡暴定亂業莫彰於創制修文粵稽邃古狃狃獠獠野處血食民莫遂其生於赫元祖睿智神明爰率我族自西徂東而撻伐用伸弧矢之利威稜震驚莫敢不來賓武烈既昭文德迺興始制冠裳宮室粒食農耕史皇作書雷歧醫經婚媾喪葬罔不典制燦陳治化之隆無遠不屆既邁古而鑠今况迺以勞定國亦畢生以惟勤此其所以貽民族保世而滋大者歷四千六百餘載而神功聖德猶赫赫如在其上以佑啓

中部縣志

卷首 祭文

我後人昔吾黨亦嘗憑藉威德以號召海內遂收光復之績而大義以申丁茲憂患薦臻之會長蛇封豕異族既駸駸以相侵緬懷創業之耿光大烈我後人亦孰敢不力排艱險以復我疆圉保我族類夙夜黽勉以自奮庶幾金甌無缺光華復旦以慰我元祖之靈又追念建國以來禮崩樂闕久未肅夫明禋迺舉祀典于歲之春聿懷明德式瞻山陵謹以復興之大誼瀝我民族之精誠庶不愧乎前烈續輝光而日新靈其鑒止來格來歆尙饗

國民政府

維中華民國二十四年四月七日國民政府敬派委員鄧家彥代表致祭於橋陵曰惟帝徇齊敦敏精德立中始制法度肇修人紀革狃榛之俗闢治化之途六相於以佐隆百家由茲託始武烈文謨邁今鑠古生民以來巍乎莫尙弘惟五族仰託靈庥遠遵盛軌凡以弼我

丕基必求無忝前烈緬懷食德依仁之久彌深水源木本之思今者
烽燧未靖水旱間告夙夜孜孜常殷忱惕謹派專員代行秩祀冀靈
爽之默贊溥德澤於斯民鑒茲微忱尙其昭格

本省各界

中華民國二十四年四月七日中國國民黨中央執行委員會暨國
民政府倡導民族祭掃之禮既特簡專使修禴橋陵陝西省黨務指
導委員會陝西省政府西安綏靖公署公推邵力子郭英夫馮欽哉
雷寶華李志剛宋志先等恭隨瞻拜謹代表全省人民掬誠祭告於
我民族始祖

軒轅黃帝之靈曰伏以經綸草昧肇開配天立極之隆振立懦頑必
推創制顯庸之烈仰維

黃祖創造中華民族以來聖聖相承迄於禹奠九州惟雍厥田上上

中部縣志

卷首 祭文

一一一

自成周建都創業以逮秦漢隋唐歷千百餘年陝西實爲我中華文
化集成之地乃降至今日竟漸卽衰靡中央乃眷西顧責以復興之
效才智短淺未有寸功夙夜惕懼如臨於淵伏念我

黃祖干戈靖亂統一華夏披山通道未嘗寧居今有習於怯弱安於
逸豫者實乃不肖之尤我

黃祖之靈必屏棄之又念我

黃祖發明制作肇啓文明任重致遠以利天下今有憚於進取甘於
錮蔽者亦爲不肖之尤我

黃祖之靈更必屏棄之是用殫誠肅志瞻對威靈所冀一德同心恢
弘祖烈凡我陝人誓隨全國同胞之後致力於復興民族期無忝爲
我黃祖子孫惟我

黃祖之靈式鑒而佑啓之尙饗

橋陵賦詩

四月七日恭謁橋山黃帝陵

邵元冲

橋陵沮水五雲飛虬柏嵯峨擁翠微萬古冠裳開邳治九天風雨下靈旂阪泉三戰玄黃血廟貌高懸日月暉瞻拜漫興多難感重光還仗一戎衣

謁橋陵步翼如先生原韻

鄧家彥

奔車萬里逐雲飛一瓣心香亦已微爲憶阪泉耀兵革願從天際降鑾旂橋山鬱鬱常餘蔭沮水悠悠未落暉自古先民王者起會看天下壹戎衣

二十四年春中部謁黃帝陵

張默君

橋山形勝鬱岩嶢沮水春深走怒潮文教覃敷千古式武威赫奕九州遙治身紫府昭靈德協律黃鐘仰鳳韶哀感崢嶸天地老重興虔

中部縣志

卷首詩

欲禱神霄

謁橋陵步默君先生原韻

鄧家彥

漫從太華賦岩嶢珍重橋山起思潮坏土衣冠初獻謁隔鄰雞犬亦逍遙十方後進追黃德一代先聲啓舜韶顧我慙惶空弔古他人掛甲柏凌霄

橋陵次翼如均奉簡溥泉力子孟碩

張默君

陵栢如龍勢欲飛詩心遙接道心微緬懷嫫祖衣天下行馘蚩尤禮旆旂動地春光明遠水漲空嵐翠亂晴暉文公孤詣終興衛同是神州大布衣

恭謁橋陵步翼如默君兩先生韻

邵力子

萬千古柏翠霞飛漫對橋陵嘅式微掛甲碑前思將帥祈仙台下想旌旂如油春雨逢佳節似錦山花接曉暉惟願秦風重振起同仇與

子賦無衣

巍然高塚起岩嶢民族精神撼怒潮廟貌中衰威尙在山容赫濯路
非遙天開草昧初垂拱石漱沮流恍聽韶仙跡渺茫難盡信至誠應
可感重霄

重刊中部縣志跋

甲戌春墨山爲中部宰欲考縣制沿革地方習尙遍索志書不得蓋版遭匪燬府無存書故也久之于劉君處得一部幸尙完好閱竟頗感內容簡陋時過境遷諸多待續因有重修之意而地方多故財用匱乏力不能逮良可悵歎乙亥清明節

中樞遣邵公元冲張公溥泉鄧公家彥來陝修祭軒轅黃帝橋陵本省省政府主席邵公與焉事後函示謂縣志宜速翻印俾存一邑故實藉識軒轅盛跡之所在至於重事纂修則姑俟來日因將原書攜往西安付梓工旣竣爰志其顛末于書後文化之孕育經濟實司其樞墨山于此有深感焉民國二十四年七月定縣甕墨山

續修中部縣志序

余幼年隨宦少長卽往來於伯叔兄季之任皆無不以志乘爲急務
余始疑其事之曠旣而稟承明訓知邑之疆域賦役政事兵防悉於
志乎繫之且以勵風俗正人心居今知古援古證今實爲吏治之大
端也後廿年幕於汴京江廣間亦常以志事爲居停計及於公事之
暇或卽古人入國問禁入境問俗之謂歟甲子秋余莅茲土風崇節
儉人去浮華所歷莫有如我中邑者展讀舊志見所載忠臣孝子義
士節婦山川形勝風土人情不禁色爲之喜神與俱往殆亦出自橋
山之毓秀沮水之鍾靈耶考其纂始於康熙癸酉已百有十五年矣
遂起續修之志而邑紳士素以耕讀兼事歲屢不登未遑計此丙寅
書大有卽丁卯春集紳士共商此舉而紳士樂從雖然創始固難而
續修亦不易濫則無以昭信略則恆懼見遺昔日之所有今日無之

中部縣志

卷之一

序

昔日之所無今日有之其間盈虛消長建置因革非書莫辨卽如我
朝曠典折地減丁貢賦已免十之七八至邑界之四至入到向未分
畫詳明民多藉訟不考核於今安知不混淆於後况百餘年來有關
氣節可繼前徽者又安知不沒世而名不稱此志之不易修又不可
不修不得不修者也前志成於堯篋麗乾五鄉先生今柏香淡齋其
裔也與坊南平原象山諸君子矢公矢慎續而成之提綱十分目四
十彙輯一編付諸剞劂閱三月而葢其事庶乎觀風問俗一邑之利
弊瞭如指掌矣是爲序

嘉慶丁卯秋知中部縣事無錫默甫氏丁瀚書

續修中部縣志序

甲子秋余膺

簡命秉鐸中部兩越月無錫默甫丁君來知縣事才敏而瞻勵精以勤甫二年政通人和百廢俱興遂有邑乘之舉夫邑乘之重於天下也尙矣自秦并六國列郡縣古侯國編年紀月比事屬詞之史亡厥後或分州或分道或分省建制不一而守土者各志其封內之山川道里沿革損益以傳諸永久下至彈丸小邑亦不廢蓋猶有古史之遺意焉我朝

聖祖仁皇帝御極之二十三年特

命儒臣纂修國史爰及郡縣各編志書以廣

彤廷博採而中邑之志於是乎成所稱三卷二十五條者前先進詳哉言之矣第百餘年來縣自延安隸鄜州鄉鎮之廢興人民之節義

中部縣志

卷之一序

有待於闡發者不少續修之舉又烏容已顧古之論作史者有三難曰才曰識曰學說者謂三者缺一不可而余於三者之中欲總之以一曰公蓋一邑之形勝因革山川疆域彰彰耳目者自不容掩而鄉曲之間所謂宦達隱德義夫節婦皆隱隱於口吻間使有一之不公或稍參以臆見則其人之實行不著卽與古史之據事直書者異矣是役也秉筆者邑紳士歲貢生坊南張君栢香劉君橋山郭君平原李君選拔貢生澹齋牛君採訪者廩生張君炳生員劉君文煥而董其成者則丁明府也雖其才其識其學未敢與古作者比列而去取惟公竊願諸君子共矢焉

皆

嘉慶十二年歲次丁卯仲夏

甲寅 恩科舉人借補中部縣訓導朝坂趙映奎撰

中部縣志舊序

王者治定功成而禮樂作文章興焉所以昭一代之典型明百王之
大法我

朝誕膺天命薄海內外罔不臣服垂五十年矣文教覃敷武功赫濯
其制作之明備直越三代而繼唐虞乃

命大臣纂修國史爰及郡縣分編志書上以顯承

列祖下以博采風謠大小臣工咸祗承惟謹惟是延安邊郡也而中
部在延屬尤稱蕞爾土瘠民貧所從來矣余承乏郡守得李令在任
中部且七年多輔余所不逮民賦樂輸案無留牘乃延耆宿編修縣
志手自裁定凡六卷余披覽終篇閱山川疆域而知地狹土磽商賈
弗通食貨維艱也閱貢賦版籍而知兵荒薦飢戶口消耗差役繁重
也閱兵防而知阻險扼塞閱水利而知沙崩岸陡閱鹽法驛政而知
中部縣志 卷之一 序

覽名勝顧橋山

軒轅帝陵在焉風氣攸萃忠臣孝子義士節婦汗漫青史且文人墨
客遊覽題咏遑遑多鴻章麗詞及鄉飲祭酒縉紳先達亦復秉正守
禮彬彬乎文獻之邦也余方欲於觀風問俗之餘進多士父老造膝
咨詢竭一得之愚用副

各憲仰體

皇上加意秦民之至意借以察訪民隱興除利弊得茲編也清戶口
以除包賠惠鹽商以汰新增荒山峻嶺穴處巢居之民不啻就聖主
而言情也異日進呈

睿覽不且大有利賴中部哉文旣大雅事亦該博述古酌今宣教達
情可以副

上旨備史乘有裨一代之典制矣是爲序

中憲大夫知陝西延安府正堂加三級蘭陵張偉寄庵氏題

中部縣志

卷之一 序

中部縣志舊序

一代之興必有一代之紀載漢高入關蕭何收圖籍因知四方疆弱盈虛之實丙吉使東曹考案邊郡兵食之有無故能指揮形勝不出戶庭瞭若指掌者圖籍之功也蓋居今而知昔援古以證今利弊興革數十百年之事非書不辨我

皇上卽位以來戡亂定治興禮樂敷教化巍巍蕩蕩登三邁五猗與隆已乃

詔修一統志併及郡縣志蓋將采風問俗緝成一代之大典也余承乏中部今七年矣諸務就理上下和樂乃延鄉先生纂修邑志以副上旨且以博觀古昔人物之偉傑孝子忠臣義士節婦之振綱植紀砥瀾迴流以及山川形勝之大建置因革之變余固不敢以鄙陋無文自謝於鄉先生鄉先生亦不以余之不敏時勤事於博稽廣咨自

中部縣志

卷之一序

康熙癸酉迄乙亥越三年而書始就顧熟諳典故多識舊事實串錯綜則壘篋先生實成一家之言焉崇揚善類嘉尚節廉一善必錄微美亦顯事有關於氣節者不啻三致意矣夫中部小邑也在唐宋則三輔大州節度刺史之所臨莅崔郭政績楊劉清德史傳所載百世猶新也乃參以二十一史準以雍大記徵以雍書咨以父老先民其間載事旣該褒貶亦正旣以續舊志於兵火焚劫代易事殊之後而余亦借是以事神治民崇德尚賢知賦役之增減明風俗之變易也惟是發揚潛德表正風化請減戶口深維鹽法今蓋竊有志焉而愧未逮也恭逢

聖天子西眷方殷大臣百執事體察民瘼覩斯編也中部利弊灼然若目見而身歷之矣庶或有造於茲邑云爾謹序

文林郎知中部縣事白下李暄蒼山書

中部縣志舊序

夫以天下名區獨讓西秦第一關中要地惟推延郡無雙鼎峙列三州不及坊州之秀麗疆分十六邑無如部邑之風華一望橋山岡巒聳翠疊怪石蔭蒼松峭逼雲霄彷彿乎華恆嵩泰載瞻沮水波浪沖瀲泛鳧鷗叢荇藻迴瀾日映依稀乎瀆海淮湘磊落孤城抱碧流而環遶魏煥縣宇迎瑤島以隆嵒傍曉霧蒙蒙縹緲龍灣澤畔當春烟漠漠纏綿鳳嶺峯頭南谷黃花開放金錢鋪滿地北橋淨雪推殘玉屑遠歸天水來楊子江心湧作飛泉滾滾月掛皇陵山半照臨蟾影輝輝允爲世上之奇觀真是人間之妙景勝槩動軒轅駕御輦而遨遊翟道仙聲聞漢武慕金莖而祈築雲臺攀龍髯以昇騰直上清虛之府向長空而拜禱仰希閔苑之丹迄今鶴馭已翀只見青霞籠玉塚憶昔羽翁難邁徒畱古蹟在岑林是以川嶽鍾靈皇風毓秀上從

中部縣志

卷之一

序

太古遞及熙清歷代人文蔚起屢朝科第雲初卽小吏農夫間有純良足錄鄉媛野婦無非節烈堪垂縣誌昭然班班可考惜遇頻經兵火煨作灰塵幸逢邑宰李公廉明清慎菁莪棫樸不殊西伯之作人蔽芾甘棠可比召公之雅化百爲盡善庶績咸康政事之餘慨然興感嘆記書之缺略嗟方冊之遺忘爰捐俸以資工乃修文而刊板詳明圖域表著懿行誠百代之鼎銘千秋之青史也余才慚作賦心慕章程聊寫里言附之卷末宣揚盛事云爾

賜進士第原任諸暨縣知縣邑人牛光斗撰

中部縣志舊序

邑有志倣古制也古之爲國者各有史官記事雖王朝列國之史皆謂之志周禮小史外史掌邦國四方之志如晉乘楚檮杌魯春秋之屬史也卽志也迨漢至班固易八書爲十志而禮樂律歷天官封禪河渠平準條分縷晰燎如列眉斯又史之變聲而志之法乘也嗣是代各有史地各有志百世而下以時修集備一方之文獻以故分野疆域官民財用人物山川上下古今不下堂而靡弗周知部邑雖僻壤彈丸黃帝陵寢所在橋山頂峙沮水腰環秦中一名勝區也古之有志與否皆不可考故明正隆間劉鄜南橋麓昆仲兩先生先後纂緝迄今二百餘年殘闕於兵火之餘余老舅壘篋公爲先生之曾孫雖恪守家乘亦僅存什一於千百部志之不可問也可勝悼哉我

皇清定鼎五十年海隅向化九有式廓共球之盛疆域之廣亘古未
中部縣志 卷之一 序
有今

天子御極之二十三年下詔修一統志令郡縣有司咸得緝志彙進按圖索籍博採遺聞增修故事哀集成書以昭車書之盛俾天下古今靡不囊括而整齊之豈非甚盛事哉是志之不可不亟爲修也然而正難其人難其事也操觚之子隳括爲工鞅掌之吏薄書是重且事曠代更則父老之傳聞無多時逾滄桑則典籍之散佚不少地係桑梓則褒美或失之濫人非土著則見聞未必其確有一於此烏乎其爲志甚矣作志之難其人難其事也邑侯 蒼山李公以班馬之才敷龔黃之政莅任數載百廢俱興尤於文墨一道深加意焉一日集邑之紳士爲修志之謀壘篋公出家藏殘帙並博採關中通志首董其事麗乾牛公馥亭蘭公余弟六翮皆參訂彙集余亦得濫竽纂修之末竊惟今邑令古諸侯也邑無大小咸得以百里侯稱侯之政

事本諸文學修志之舉謂非致治之端乎覩疆域建置之廣狹而發
政施仁民是以可樂瞻山川風土之攸宜而耕鑿無擾民是以可利
景名宦循良之芳軌而去其煩苛民是以可安察賦役戶口之多寡
而取用有度民是以可富觀忠臣孝子義士節婦之懿行而挽其頽
風作其廉恥民是以可淳鑒選舉人物之褒崇而詩書絃誦興行率
俗民是以可勸覽古蹟祠廟之興廢而思敬思哀民是以可興春秋
鄭子產以惠頌於國人於辭命特推潤色蒼山公之功詎出僑也下
哉是役也上以副

聖天子一道同風之治下以垂千百世憲章不刊之典是誠曠代之
史豈一邑之志已哉

賜進士第四川鄆都縣知縣邑人張鳳翀撰

中部縣志舊序

明府李公蒼山先生修輯中部志成索紳弁言余再拜而爲之叙曰志者史之一體而縣志則郡國之權輿也先儒有三史莫尙於志蓋將求諸制作之林非徒以文詞爲工也聞之宋太平中作寰宇記考證頗詳惜其書不傳然人文之目當時固謙讓不逞也故明李文達竭生平之力爲一統志而所載方輿多與舊史不合故論者謂讀通志不若讀郡志讀郡志不若讀縣志君子以爲知言中部志闕有年矣故明正隆間邑人鄜南橋麓兩劉先生纂修成帙後以鼎湖之變屢經兵燹斷簡殘篇無所信從今值

聖天子考文徵獻之時復得公起而修之公江南俊傑甫仕楚雄善政不可枚舉再仕吾邑吾邑他人目之爲衝疲事事棘手公內無賓史鳴琴坐理取辦俄頃嘗恢恢其有餘地而賢士大夫日相往來懸

中部縣志

卷之一 序

一

魚種菊飲酒賦詩遠近傳誦紵衣縞帶有春秋卿尹之遺風居嘗慨然曰夫子說夏禮而傷杞不足徵學殷禮則曰有宋存焉未幾杞降而稱子而宋猶得以上公周旋盟會之列歷二百四十年不改然則邑之有志文獻之存亡係之不綦重哉於是招集羣賢講求故實堯篋劉先生乃鄜南橋麓之嫡裔曾孫也因爲之執牛耳與麗乾牛馥亭蘭諸先生共襄厥事余與家兄九苞亦濫竽其側公裁定之以庀其成其始也搜書按籍爰備採擇復旁稽輿論探索真僞故其言無虛僻哀然爲一邑信史况公治部五載防固封疆遍覽山川之勝勸興農務時清欺隱之田惟正有供何以昔費而今簡輜軒載道何以昔勞而今逸以及民風之若何砥飭人才之若何嘘培文教之若何釐正凡志之所載者公一一見諸施行又豈若操觚家只矜文詞博雅云爾哉且也當日鄜南橋麓修志時出於重熙累洽之際又乘其

里居暇日爲之公志乃自簿書期會間與三五縉紳草創焉討論焉修飾而潤色焉不日成之增益而不失之華率直而不失之肆視延郡志陝西通志善有加矣余之學疎仕拙遠愧諸先生尤遠愧公庶幾附公以傳不朽公在部多異政行將
夫

康熙壬申冬十一月長至日

賜進士第四川大竹縣知縣邑人張鳳翀撰